

雲

起

軒

詞

鈔

雲起軒詞鈔序

詞家至南宋而極盛亦至南宋而漸衰其衰之故可得而言也其聲多暉緩其意多柔靡其用字則風雲月露紅紫芬芳之外如有戒律不敢稍有出入焉邁往之士無所用心沿及元明而詞遂亡亦其宜也有清以來此道復振國初諸家頗能宏雅邇來作者雖眾然論韻遵律輒勝前人而照天騰淵之才溯古涵今之思磅礴八極之志甄綜百代之懷非窘若囚拘者所可語也詞者遠繼風騷近

沿樂府豈小道歟自朱竹垞以玉田爲宗所
選詞綜意旨枯寂後人繼之尤爲冗漫以二
窗爲祖禰視辛劉若仇讎家法若斯庸非巨
謬二百年來不爲籠絆者蓋亦僅矣曹珂雪
有俊爽之致蔣鹿潭有沈深之思成容若學
陽春之作而筆意稍輕張皋文具子瞻之心
而才思未逮然皆斐然有作者之意非志不
離於方野者也余於斯道無能爲役而志之
所在不尙苟同三十年來涉獵百家摧較利
病論其得失亦非捫籥而談矣而寫其胸臆

則率爾而作徒供世人之指摘而已然淵明
詩云兀傲差若穎故余亦過而存之且書此
意以自爲其序焉光緒壬寅十二月萍鄉文
廷式

雲起軒詞鈔

萍鄉文廷式

采桑子 記西湖舊遊

水西山北閒遊處翠蓋招涼紅袖拈香雁外
鷗邊易夕陽石牀自埽松陰冷卧想秋江
幾許清狂潘鬢年來也白霜

點絳脣避暑

扇力微微晚風乍喜吹衣帶蘭臺賦在一霎
炎光改箴竹當窗畫意憑誰會吟天籟琴
聲自解曲罷龍歸海

河傳

宵靜鐙燼月臨窗瓜架蟲聲送涼怨君憶君
清漏長羅裳近來銷舊香 錦字書成情默
默親手織要勝春花色繭多絲柳多枝不
曉風千里吹

長相思

鈿笠篋纖指柔一曲吳歌不上喉時時餽倦
眸 錦纏頭金帶鉤細喘輕顰博得不誰知
離別愁

浣溪紗

縹眇眉痕憶遠山一春愁思不曾閒斷雲祇
在有無間原是花身應惜惜猶凝竹淚記
斑斑小樓今夜恰輕寒

又

曲曲闌干淡淡雲蘭儀蕙質杳難分卸釵聲
溜隔簾聞釀雪庭陰愁意緒聽香牀角倦
嚀呻不成幽夢枕微溫

虞美人乙未四月作

無情潮水聲嗚咽夜夜鵲啼血幾番芳訊問
天涯不道明朝已是隔牆花夕陽送客咸

陽道休訝歸期早銅溝新漲出宮牆海便成
田容易莫栽桑

念奴嬌

一村臨水乍迎風含笑野桃春媚穠豔波光
相映發惆悵無情有思燕子不來東風容易
目斷芳塵委高鬟愁極更煩爭響料理 休
說前度劉郎重來不見鎖赤城霞氣路轉峯
前征騎影咫尺便迷千里芳草連雲巖花拂
袖驛館空庭閉悶來無寐庾詞聊託麻紙

夜遊宮

疏雨困眠孤館薄衾冷漏籤時斷溼羽投林
鳥已倦斂秋心白雲巖黃檨峴 瑟瑟湘波
遠動吟思楚歌聲怨濁酒深杯且自勸渺關
河意難忘君試忖

高陽臺和半塘乙盦韻卻寄

靈鵲填河驚鳥繞樹秋來一樣心期簾額風
輕金鑪篆裊香微雲樓霧幕參差起黯瑤情
未許人知寫銀牋四角中央難寄離思 淒
涼茂草褰衣處儘江河日暮淚下連絲猛拍
闌干憑他蝶醒鶯癡重陽蕭索青燕國來信云七

夕前三日得信在
重陽日故有此句
恁霜寒籬菊能支
莫教人
刻盡瓊華留映新眉

附原作題云乙冬消寒道希約作豔詞

因循未果秋風容易觸緒懷人
作此寄之

王鵬運

羅幃侵塵翠綃封淚星河慵問秋期巫峽
荒唐玉樓雲雨罪微狂紅濕說秋花豔問
年年腸斷誰知算何如花是將離草是相
思玉纖禁否西風冷想深閨刀尺夜怯

瓊絲熱遍沈檀多生難懺情癡瑤階玉輦
春如海記夜寒吟袖同支看籠煙一抹遙
山愁鎖修眉

和作

沈曾植

借月滿愁箋天斷夢碧城十二星期擁髻
歸來夜闌露細風微中庭種樹成紅豆那
寒心嬰鶚先知判酬他扇底秋心弦上秋
思 當年對影聞聲地賸花濺淚萼柳裊
愁絲羅帶同心有情天亦憐癡荒唐夢峽
歸雲晚甚神娥猶妒腰支祝芳風莫冒飛

部下職員の

1

訴衷情湖壩水退衰草冬晴來時沙漠

筆爲賦此詞

人閒日日有滄桑湖草只尋常依然舊日鷗鷺便換水雲鄉
　　餽紙帳對茶鐺細思量月

華金鏡風捲銀濤一樣瀟湘

點絳脣重九

風緊天高興來欲射雲閒雁平蕪楚甸漠漠
清霜染不省題餠也少悲秋伴登臨健蘭
芳菊豔高想橫汾宴

卜算子水仙花

香靜玉盤安影薄銀屏繞白石清泉偶遇之
不礙花光小唱徹大江東此意無人曉若
見湘皋解佩時我自拌花惱

鷓鴣天

蝶夢遽然別有天蠅鑽故紙幾何年在山遠
志何如草入世忘憂不藉萱 身外物句中
元一回攬鏡一欣然川如碧玉山如黛不是
吳兒也叩舷

憶江南詠雪

天欲暮旋覺白光寒銀闕半空俄隱現瓊林
萬樹各飛翻何處是三山 行且止茸帽據
征鞍任是梅花開遍也不曾春夢落人閒詩
思已闌珊

邁陂塘惜春

任嘯鵲苦催春去春城依舊如畫年年芳草
橫門路換卻王孫驄馬愁思乍甚絮亂絲繁
又過寒食也殘陽欲下好飛蓋西園玉觴滿
引秉燭共遊夜 瓊樓迴孤負緘詞錦帕銅
仙鉛淚休瀉落紅可及庭陰綠付與流鶯清
話歌舞罷便熨體春衫今日從棄捨雕鞍暫
卸縱行遍天涯夢魂慣處猶戀舊亭榭

清平樂有憶

畫羅雙鳳素舸曾相送一夕梨雲無好夢簾
外月明如汞 桃根桃葉誰憐江南好暮秋

天贏得樓頭指點木蘭可是郎船

賀新郎 丙戌都中與汪莘伯聯句之作

迄丙申秋乃於漢口志仲魯前

輩書中得此故紙詞雖不工姑

錄存之以誌鴻爪

天末春將老過清明海棠開罷柳絲吹少

道

希幾日子規啼不住棖觸離人懷抱

汪兆銓莘伯

看一片黏天芳草

道希

綠到平蕪將盡處又

斜陽雲外青山繞空望遠長安道

莘伯

故

人此際應西笑還念我麻衣飲墨緇塵撲帽

道希

十載詞場供跌宕贏得中年近了

辛伯

況歲晚江湖潦倒豪竹哀絲蒼生志儘昂頭
付與蘇門嘯龍氣在鴻飛杳

道希

沁園春 櫟括楚詞山鬼篇意以招隱士

若有人兮在彼山阿澹然忘歸想雲端獨立
帶蘿披荔松陰含睇乘豹從狸且挽靈修長
懷公子薄暮飄風偃桂旗難行路向石茸捫
葛山秀攀芝 最憐雨晦風淒更猿狖宵鳴
聲正悲悵幽篁久處天高難問芳蘅空折歲
晏誰貽子或慕予君甯思我欲問山人轉自

疑歸來好有華堂廣
讌慰爾離思

念奴嬌 安埜地觀劇紀事

衣瓜夏五試于闐新樂
柘枝蠻鼓七寶樓臺
彈指現乍染繽紛花雨
鉤動聲輕釵橫光顫
寶靨明星互天河不隔
盈盈咫尺無語 爲
問拾翠洲邊明璫未解
可要陳思賦結綺臨
春朝復夜贏得東昏千
古海綠非春雲香何
葉迴首蘅皋暮維摩病
也憑誰問訊天女

蝶戀花 戲贈陳伯嚴同年

細雨輕塵春窈窕
看盡紅嫣自覺孤芳好
繫

馬垂楊臨大道更無人處多幽草
六曲屏山歸夢繞油壁香車何計迎蘇小
紈扇無情金鈿杳高樓日日東風老

金縷曲壽李木齋前輩卽送其還京之

作

把酒爲君壽論世閒高名曼福似君稀有但
使雍容平進取黑髮便躋台斗況才力淵涵
地負默數吾鄉誰健者定瓊琚玉佩追歐九
曾小試揆天手周南留滯今非久卻回顧
天吳罔象濤飛山走指點齊州煙點外朱鳥

迴吟霜味震大地洪鐘一吼喚醒市朝紅紫
夢看東方耿耿蒼龍宿天莫醉賜鶉首

釵頭鳳

嬌波溜纖腰瘦仙袞百幅香羅皺乘鸞舞流
鶯語瑤觴飛贈修羅天女舉舉舉花簪鈕
瓜盛斗綠雲深處重攜手青冥路神霄侶幾
時清聽天風琴譜許許許許

醉太平

征衫酒澆香衾夢遙陽關四疊魂銷折長亭
柳條年光易凋山川自遼行人白髮飄蕭

過當時板橋

浪淘沙赤壁懷古

高唱大江東驚起魚龍何人橫槩太恩恩未
鎖二喬銅雀上那算英雄 杯酒酹長空我
尙飄蓬披襟聊快大王風長劍幾時天外倚
直上崆峒

瑣窗寒九江旅舍中秋無月風起浪飛

江聲撼枕愁不得眠得詞一首
參用周美成瑣窗寒月下笛二
調音節倚聲之家未必謂然龍

吟雁哀如似相答明晨且遊廬
山以滌塵慮故末語紀實云爾
暑裕延涼霜蓬點水暮吳朝楚閒汀沙鷺識
我慣行羈旅響驚颿簷鐵夜鳴怨蟲敗壁聲
更苦怪素娥淒斂深宵不放一痕光吐酒
所看今古對斗柄芒寒滿江清露琵琶自語
誰似當年白傅倚危闌愁見浪花海雲正起
郎勿渡且淹留獨翫屏風九疊朱鳳舞

八聲甘州送志伯愚侍郎赴烏里雅蘇

臺參贊大臣之任

響驚颿越甲動邊聲烽火徹甘泉有六韜奇
策七擒將略欲盡凌煙一枕曹騰短夢夢醒
卻欣然萬里安西道坐嘯清邊策馬凍雲
陰裏譜胡笳一闕淒斷哀絃看居庸關外依
舊草連天更回首淡煙喬木問神州今日是
何年還堪慰男兒四十不算華顛

高陽臺塵

燕幕回春蛛簷罥絮陌頭認取新妝幾日驪
歌餘聲猶在雕梁迴颿輕颭菱花影有箇人
寶瑟淒涼檢紅箋細寫相思淚黯千行一洛

神賦後清才減久低徊羅韞想像明璫香界
微聞紅樓隔雨相望重尋壞壁留題句感潛
郎鬢已如霜祇宵來千里雲開應共清光

浣溪沙旅情

畏路風波不自難繩牀聊借一宵安雞鳴風
雨曉光寒 秋草黃迷前日渡夕陽紅入隔
江山人坐何事馬蹏閒 用山巨源語

祝英臺近

翦蛟綃傳燕語黯黯碧雲暮愁望春歸春到
更無緒園林紅紫千千放教狼籍休但怨連

番風雨 謝橋路十載重約鉏車驚心舊遊
誤玉佩塵生此恨奈何許倚樓極目天涯天
涯盡處算祇有濛濛飛絮

廣謫仙怨聞之唐明皇登駱谷之時有
思賢之意是以終戡大亂旋
返舊京余以爲明皇見機早
規入蜀故雖倉皇遷徙而事
勢昭然不然靈武之眾焉得
嗣君勤王之師孰爲標目登
谷還覽意在斯乎屢遷而存

古有明鑒寶康之意今更廣之

元菟千里烽煙鐵騎縱橫柳邊玉帳牙旗迤
遁燕南趙北騷然相臣狡兔求窟國論傷
禽畏弦早避漁陽鼙鼓後人休笑開天

木蘭花慢送黃仲弢前輩解官奉親赴

大梁卽題其載書泛洛圖

春明門外路看迤邐接天涯任當道豺狼處
堂燕雀起陸龍蛇莫邪且藏匣底飽河魚洛
筍卽爲家滿載英光書畫閒吟嵩少煙霞

京華聚散等搏沙世事一長嗟是楚澤椒蘭
齊邱松柏秦國蒹葭靈槎不浮天上鑄玲瓏
無術教皇媧他日劉郎重到玄都認取桃花

天仙子

曲曲闌干淺淺池風定簾鉤不上絲玉人春
睡損羅衣雲護密月來遲誰見風流絕代姿

又

草綠裙腰山染黛閒恨閒愁儂不解莫愁艇
子渡江時九鸞釵雙鳳帶杯酒勸郎情似海

望江南

遊俠好結客過邯鄲孔雀羅裙擎玉盃驚兒
錦帕覆雕鞍騎出萬人看

遊俠好遠出不須糧偶憶蒲萄過大宛閒尋
芝草渡扶桑何處是他鄉

遊俠好不願執金吾寶瑟歌成三婦豔銀鎗
舞急萬人呼賭酒更擣菹

遊俠好雄劍動星文易水行時虹貫日扶餘
王後氣成雲此局未輸君

遊俠好縱獵玉驄騎金彈戲拋林外雀珠弓
曾射水中蛟千里極蕭條

八歸答子培沈刑部贈別之作

洪流帶郭平蕪紆轡南陌乍染濃碧斜陽淺
映城闌處猶認亂鴉催暝飛燕愁夕葵麥參
差春色老好料理江湖歸楫恰難忘載酒經
過寂寞子雲宅誰信蒼梧路阻憑將心事
喚醒西京銅狄晉蛟潭底拜鵲林下此意無
人知得向東風擣麝吹起香塵遍今昔鈴聲
緊別愁如海曠野星稀蒼涼歌主客

三姝媚王幼霞侍御見示春柳詞未及
奉和又有送行之作賦此闕答

之

鶯囀春思苦看湖山紛紛尙餘歌舞折柳千
絲帶酒痕猶沁錦襟題句倚遍危闌澹暮色
飄殘香絮似繡園林一霎鵲聲便成今古
當日花驄聯步共遊冶春城踏青歸路夜半
承明聽漏聲疑在萬花深處可奈東風吹不
散濃霧淒霧好記靈和舊恨清商自譜

附沈子培見贈之作

十分春已去孤花隱葉怱悵倚闌心客遊
今倦矣珍重韶光還共醉花陰長亭短堠

向從來雨暗煙沈人何處匣中寶劍挂壁
作龍吟 登臨秦時明月漢國山河儘雲
寒雁噤行不得鷗鵠唳晚苦竹穿林尋常
總道歸颿好者歸颿愁與潮深暮蒼蒼高
山流水素琴

渡江雲

銀管頻催瑤華重折別懷奈許澹日暉暉
春城夢夢還是鳩呼雨東風酒泛南風草
長那更北風鈴語問歸程桃花萬點尋源
知向何處 拏音去了延緣誰見海水天
風今古白馬潮迴青牛氣杳身世元無住

隴前麥秀龐公來往擁鼻試吟梁甫西江
水馬駒蹴踏付堂頭舉 永遇樂

賀新郎 贈黃公度觀察

遼東歸來鶴翔千仞徘徊欲下故鄉城郭曠
覽山川方圓勢不道人民非昨便海水盡成
枯涸留取荊軻心一片化蟲沙不羨釣天樂
九州鐵鑄今錯 平生儘有青松約好布被
橫擔柳栗萬山行腳閭闔無端長風起吹老
芳洲杜若撫劍脊苔花漠漠吾與重華遊元
圃迴車日色崦嵫薄歌慷慨南飛鵲

附黃公度作乙未五月芸閣南歸飲集

吳船各撫賀新郎詞以誌

悲懽同作者梁節菴王木

齋也

鳳泊鸞飄也況眼中蒼涼煙水此茫茫者
一片平蕪飛絮亂無復尋春試馬又漸漸
夕陽西下水輭山溫留扇底展冰簟試照
桃花寫影如此淚重灑尋思羅裊臨行
把竟明明皎綃分翦公然割捨天到無情
何可訴只合理憂地下但何處得開酒社

相約須臾毋死去儘丁歌甲舞今宵且看
招展花枝惹

賀新郎贈梁節菴

髯也今殊健舉世間雞蟲得失魚龍曼衍盡
付莊生齊物論一例浮雲舒卷任蘭佩多憎
獬犬白眼看天蒼蒼耳古今來那許商高算
問長夜幾時旦酒酣更喜綸巾岸記當日
軍謀借箸尙方請劍誰道神州陸沈後還向
江湖重見情不死春蠶自繭黃竹歌成蒼駭
杳悵天荒地老瑤池宴斜日下淚如霰

踏莎行題明葉蕙綢鴛鴦夢傳奇崇禎

丙子刻本

英憲傳經光威聯句一家詞賦堪千古誰知

中女更多才銅駝別有傷心處

傳奇作於崇禎丙子而其

言云若論世道荆棘銅駝煞多感慨是易代之感實有前知又云奈荆棘成叢誰敢指北極半天蟠螭亦警句也紫玉成煙紅簫未譜一痕斷

硯畱眉嫵仙盟佛證總無聊薰風獨據珊瑚

樹

借用葉小鸞詞句

南歌子閨情

日上紅蕖麗霜前赤棗收蓮汝在心頭郎情

休便冷未經秋

鐵鹿沈長索金蟾齧碎香荀令好兒郎緘情
親寄與耳邊瑤

豆挾長縈荻桐花未燥枝龍笛月中吹就中
阿那意許儂知

髮鬢花安髻玲瓏鏡織衣春暖蝶雙飛纔醒
還復睡下羅幃

翠樓吟歲暮江湖百憂如擣感時撫己

寫之以聲

石馬沈煙銀鳧蔽海擊殘哀筑誰和旗亭沽

酒處看大鵬風檣義輅元龍高臥便冷眼丹
霄難忘青瑣眞無那冷灰寒柝笑談江左
一筇能下聊城算不如呵手試拈梅朵茗鳩
栖未穩更休說山居清課沈吟今我祇拂劍
星寒敲屏花妥清輝墮望窮煙浦數星漁火

春光好新年

新酒熟早梅妍久晴天貼燕黏雞坊宅遍又
新年 休憶壺瀛舊事且將詩酒隨緣家計
無多生願足五湖船

西江月

削竹閑栽菊枕煮茶自洗椰瓢一鐙搖夢雨
蕭蕭苔院更無人到世翳已除眼纈愁塵
不上眉梢布衣來往秀江橋休問五陵年少
唐吳融詩五陵年少如相問阿對泉頭一布衣

側犯詠梅用白石道人詠芍藥韻

乍來又去幾時得共孤山住疏雨對綴玉繁
枝換春句天寒倚翠袖杳漠無尋處仙語想
洞戶雲開暫迴顧空階雪凝鶴向天風舞
應約个美人來華月映雕俎信遠難期暗占
花數甲帳簫鸞十眉重譜

好事近湘舟有作

翠嶺一千尋嶺上彩雲如幄雲影波光相射
蕩樓臺春綠仙鬟撩鬢倚雙扉窈窕一枝
玉日暮九疑何處認舜祠叢竹

如夢令

卅字闌干纔倚銀字箏弦親理臨過十三行
便有驚鴻心思年紀年紀可是莫愁織綺

霜葉飛丁酉冬閒聞粵中故人如葉蘭

臺陳孝直陶春海輩先後凋謝

余少長嶺南一時名流咸得款

接如許涑文侍講顏夏廷兵備
則父執也李仲約侍郎久相識
後爲余朝考師張延秋姚穉甫
兩編修林楊伯明仲兩主事許
天倬副貢陳慶笙秀才諸人並
文酒追從樂數晨夕十餘年來
僅有存者新阡宿草杳漠何期
誠知天道變衰早死未爲不幸
特文字之習猶不能忘海上客
遊爲填此闋譜入笛聲當不減

山陽之賦也

海風吹老鼓簷樹幽窗涼夜偏早前塵依約
越中山問甚時重到憶俊侶英遊不少金鞍
寶馬呼鸞道更珠江浩渺良月灩笙船眾花
齊映歡笑因甚耆彥風流十年前後新墳
盡長秋草江山滿目淚沾衣是而今懷抱算
不及魂歸朱鳥波濤萬頃珠沈了待近約梁
鴻去謂梁節菴踏遍千山萬山斜照

南歌子詠蝶

著雨花如繡尋芳爾最忙夕陽影裏自成雙

卻省是誰春夢繞迴廊 曾向仙山住休誇
綺閣妝阿儂春倦懶顛狂且對蘭蕤消受一
絲香

鷓鴣天贈友

萬感中年不自由角聲吹徹古梁州
荒苔滿地成秋苑細雨輕寒閉小樓
詩漫與酒新籌醉來世事一浮漚
憑君莫過荆高市潯水無情也解愁

少年行日本藝妓瓢箪書來戲題其後

日本人謂葫蘆曰瓢箪

清臚映雪纖腰貼地東日照名姝教剝瓜犀
戲堆鴈鳳情態半憨疏還相問近來消息
懷得漢書無如此壺天儘留人住我欲再乘
桴

李清照詞我欲乘桴浮到日華東

虞美人

眉上雅黃釵上鳳壓尋宵愁重竹梢清露滴
闌干中有湘娥幽泪不曾彈鶯慵蜨倦都
無賴薄恨屏風外博山鑪子篆香熏不信鑪
煙散後作行雲

玉樓春

南來北去經行慣
歷歷關河長在眼
仙山無樹鶴書稀
滄海生波龍穴淺
袖中賸有陰符卷
醉裏不辭游俠傳
借如李令擁旌旗
何似顧榮搖羽扇

洞天福地何森爽
芝草琅玕日應長
浩歌華月碧山閒
九點齊煙如在掌
清狂試演霓衣唱
自扣銅鉦神益王
一杯舉手勸長星
江水滔滔前後浪

念奴嬌 畬皮麓雲同年見贈之作麓雲

時掌教江西經訓書院又所著

有尙書大傳疏證尙書今文疏
證孝經鄭注疏證等書故詞中
及之

十三年事似波流電激不堪重攬幾度京華
聯客袂幾度江鄉清讌虎觀談經麟臺奏賦
之子瀟湘彥枯桑海水近來添入詩卷呼
酒重話離情簷花慘席細雨孤鴻遠君自有
琴彈不得清廟明堂三歎巾卷充街金絲在
壁未信功名晚幽蘭花發風烏特地徐轉

臨江仙壬午廣州舊作

伏雨初收闌檻潤葛衫蕉扇新涼一年休負
好時光詩教蠻婢讀酒對馬軍營他日誰
修輿地志嶺南卽是吾鄉異名掇拾補羣芳
龍牙和粥碗鷲爪壓釵梁

浪淘沙

半捲水精簾漏靜香添薄寒已是換吳縣鏡
裏修眉天上月比似纖纖閒檢道書籤嬾
卸花鈿嬌羞卻趁翠帷前坐又不成眠又起
良夜厭厭

鷓鴣天王幼霞御史得其友人由江南

揭寄江總殘碑因作秋窗憶遠
圖屬題爲賦此闕

壁滿花穠世已更讀碑猶記擘箋名屋梁月
落懷人夢易水霜寒變徵聲 家國恨古今
情鏡中白髮可憐生君知六代恩恩否今夕
沙邊有雁驚

鷓鴣天卽事

劫火何曾燎一塵側身人海又翻新閒憑寸
硯磨礪世醉折繁花點勘春 聞柝夜警雞
晨重重宿霧鎖重闌堆盤買得迎年菜但喜

紅椒一味辛

臘鼓聲中醉一杯
世情不復强安排
錯從蟻穴聞牛鬪
自縱鵬天任燕猜
看傀儡賣癡
𦰩草頭木腳滿
槐街祥雲輝映三千界
曾見崆峒訪道來

鬲溪梅令詠鸞枝花

妝臺長記別離時
小橫枝幾度疑
桃辨杏眼迷離玉
纖勻淡脂
女牀何處覓鸞栖
未歸遲
自把玉簫閒倚月
明吹錦衾春思迷

虞美人題朱艾卿洗馬同年小像

臨風玉樹青春裏省可青春意畫堂端笏奉
安輿不是張梨周棗賦閒居 華芝生柱皋
禽唳便有朱霞思男兒好好畫淩煙纔稱風
流張緒想當年

鷓鴣天

著意尋春春已闌東風一夕轉輕寒玉驄踏
偏長安陌爲戀殘紅小駐鞍 黃鶯舉白鷗
閒須從塵外看青山花冠不羨天香馥坐弄
裊瀛祇一丸

上西樓

紅愁綠怨誰家夕陽斜青草池塘閣閣數聲蛙
攬清鏡理殘鬢別情賒此夜月明霜信到天涯

風流子 江樓夜眺

捲書拋短枕江樓迴倚檻看疏星但峭風透
幌麗譙聲急溼煙迷渚漁火光冥渺何許山
蕪添秀色湘茼接餘馨檀板自歌一丸月暗
玉觴豪舉八表雲停沈憂無端起哀鴻怨
舉世有耳誰聽天際水何澹澹山自青青算
滄海生桑春歸漢燕汴隄無柳秋老隋螢祇

恐銅仙淚盡露冷金莖

水龍吟

落花飛絮茫茫古來多少愁人意游絲牕隙
驚飆樹底暗移人世一夢醒來起看明鏡二
毛生矣有葡萄美酒芙蓉寶劍都未稱平生
志我是長安倦客二十年輕紅塵裏無言
獨對青燈一點神遊天際海水浮空空
中樓閣萬重蒼翠待驂鸞歸去層霄迴首又西風
起

長亭怨慢和素君韻寄遠

聽黯黯長安夜雨那是儂家放教歸去
檠短牕虛夢魂彷彿到江浦愁生無定應是有生
愁處寄遠織瓊花渾不省涼蟾天宇凝此
祇蘭紅波碧依約謝娘眉嫵文園病也更堪
觸傷春情緒便月痕不上菱花儘難忘衣新
人故但乞取天憐他日翦燈深語

附原作

甚一片愁煙夢雨剛送春歸又催人去
鷗外帆孤東風吹淚墮南浦畫廊攜手是那
日銷魂處茜雪尙吹香忍負了嬌紅庭宇

延佇悵柳邊初月又上一痕眉嫵當初
已錯忍道是尋常離緒念別來葉葉羅衣
已減了香塵非故恁短燭低篷獨自擁衾
愁語

蝶戀花

一片閒愁無處著空裏游絲直任風飄泊望
斷闌干天一角夕陽那似春魂薄青鳥無
端傳密約玉印檀痕莫負香香諾王母桃花
開又落彩雲夢遠閒池閣

臨江仙廣州舟中作

嶺外尋春春景異木棉處處開花艣聲人語
共呶啞蠻神依櫟枯水市足蠔蝦一曲招
郎才調好道光間招子容孝廉閒聽蛋女琵琶
翦風絲雨送歸鴉近來情性別不弔素馨
斜

摸魚子

記瑤臺繡襦甲帳阿儂十載曾住檀槽一曲
當筵醉別遇散花天女情淡汙偏絮絮星星
向我深深訴蓮心太苦怕如水年華傲人心
性無地可安附聰明錯解慮落花風雨酒

闌別樣酸楚廣平那是心如鐵也擬梅花一
賦還自語看禪榻茶煙未稱迎桃渡離愁萬
縷正清曉江潭淡雲籠月黯黯碧空去

減字木蘭花 柳江舟中

萬山明月照我孤舟正愁絕若待無愁除是
湘江更不流 鴻南燕北別後年光成惜惜
不信淒涼看取潘郎鬢上霜

清平樂 儼唐人

沈思夢裏一枕嬌雲膩似醉如矜眠又起的
的可郎心意 征衫別淚千行不浣爲惜餘

香夜夜相思無寐羅幃況值初涼

南鄉子題易碩甫洞庭眺月圖

雲散晚山青又泛扁舟過洞庭月下一聲吹
鐵簫淒清祇恐魚龍不慣聽紅燭夜冥冥
靜寫秋光入畫屏寄語幽蘭兼白芷芳馨可
解騷人萬古情

滿庭芳江永舟中偕易碩甫聯句用周

美成韻

去國裝輕催年鼓疊離人與月難圓碩甫江
寒浪淺千里上孤煙道義寫出離騷古意斷

冰雪石瀨濺濺

碩

乘風去無歸也好同泛謝

公船

義

殘年懷舊隱梅花幾樹竹屋三椽

碩

居

碩

甫

於

廬

山

築

屋

祇

大

千

雲

影

飛

落

襟

隱

居

半

載

故

詞

及

之

祇

大

千

雲

影

飛

落

襟

前義

欲

倩

湘

靈

海

若

理

瑤

怨

同

訴

冰

絃

碩

琴

音悄悄憑誰徵調喚醒老龍眠

義

青玉案旅況

東風綠遍江南草偏作客長安道寒入燈花
愁悄悄漏聲淒緊雲容慘澹不是天將曉
飢鰓齧案栖鴉叫坐惜霜華鏡中老別院管
絃聲正鬧驚殘短夢關心搖落簾外花多少

蝶戀花

驀地閒愁千萬疊似絮如絲盡向心頭結疏
雨透窗鐙欲滅和衣臥聽寒更徹 經歲悠
悠魚素絕誰料關情心比秋潭潔易買華鬢
天上月難酬仨苦停辛節

臨江仙

我所思兮江上路因風贈與瑤華玉樓天半
捲朱霞飛鴻將遠夢一夜到伊家 強忍閒
情情轉切淚痕彈溼窗紗相思相望各天涯
知卿憔悴甚不忍問桃花

浣溪紗

雲母窗中覩阿環輕顰彷彿認遙山惜春春
在有無閒顛倒無端看紫鳳然疑不定悵
青鸞寂寥情況且加餐

點絳脣望月

無著秋光依空誰住山河影靈懷修迥祇有
仙娥靚太乙朝迴玉露晨霄警齋宮請疏
麻折盡萬歲千秋肯

紫府清遊飢來偶噉金盤棗靈妃窈窕迴顧
羅幃笑一段琴心萬古知音少歸來好玩

茲芳草自寫黃花照

南樓令

何處秣陵春江波送遠人感情深淚漬紅巾
未到鶯啼先惜別風水闊隔天津義山詩一
津微雨問湖濱斜陽弔孝陵泛秦淮春水
方生卻想歡期渾是夢憑綺語駐芳塵

虞美人題李香君小像

南朝一段傷心事楚怨思公子幽蘭泣露悄
無言不似桃根桃葉鎮相憐若爲留得花
枝在莫問滄桑改鴛鴦鷺鷥一雙雙欲采芙

蓉樵悴隔秋江

永遇樂秋草

落日幽州憑高望處秋思何限候雁高鳴驚
磨畫竄一片飛蓬捲西風萬里踰沙越漠先
到幹難河畔但蒼然平原目極玉關消息初
斷 千年祇有明妃冢上長是青青未染聞
道胡兒祁連每過淚落笳聲怨風霜頓改關
河猶昔汗馬功名今賤驚心是南山射虎歲
華易晚

浣谿紗

濃睡方醒日已斜
翻嫌晴色晃窗紗
郎前紕繆故些些
少可英雄偏說劍
特矜顏色愛評花
世間兒女怎如他

纔啟朱櫻轉自緘
柔腸似結解應難
感郎情重畏郎憨
也解避嫌防後悔
時將薄怒掩深慙
此時輕別阿誰甘

小醉歸來夜已分
新茶潑乳捧殷勤
夢回初覺髮香熏
昵枕低幃千種態
向時矜重霎時親
細看濃翠拂輕鬢

雨浥緇桃特地鮮
春嬌濃發鏡臺前
含羞含

恨不能言 如此風流天賦與暫時憎別揔
潸然郎情認取枕函邊

窈窕疏花憶淡妝遠山如寫畫眉長那堪微
雨溼衣裳 夢好渾忘銀漢迴書來猶帶繡
檀香相思無底不能量

清平樂冬日

川流晝夜逝者如斯也纔見日光飛野馬旋
已三商漏下 紛紛甕裏醯雞何如一枕希
夷喚起歲寒松柏吾將與爾同歸

更漏子

翠螭疏丹榭老萬事不如歸好蟲唧唧雁嗷
嗷碧天無限高 倚闌望江海上落日寒雲
莽蒼望不極思何深滄波千萬層

水調歌頭病中戲答友人

卿用卿家法我與我周旋胸中一事無礙便
算小遊仙借問封侯萬戶何似買田二頃耕
鑿賴天全可笑蘭臺史祇欲勒燕然 眾生
病吾亦病不關禪靈光皎皎孤映空水共澄
鮮說法何須龍象相笑從他蜩鷺摠付大中
千倦卽曲肱臥火宅已生蓮

高陽臺爲江建霞題太常仙蝶圖

柳外輕盈花間綽約滕王圖繪難眞乍集閒
庭些些情意關人江郎自有生花筆寫蘧仙
一段丰神記當年相見靈山可是君身建霞先數
年於虎邱曾見之羅浮我亦曾清夢有落花萬片
雨積如茵不似京華污衣十丈緇塵殷勤欲
問西王使遍人間何處宜春祇憐他薄酒微
熏膩粉初勻

慶宮春

岸葦平潮渚蓮銷粉暮雲作去聲盡秋色涼入

空江蕭蕭夜雨短篷清溜自滴記曾分手黯
春緒垂楊未碧山圍依舊偏是孤燈照愁今
夕旅懷坐對茫茫白髮新添此情誰識連
環解贈淩波去後嶺竹斑痕猶積袖羅香減
悵天遠難憑雁帛初寒清警幽夢醒時隔江
聞笛

木蘭花慢寄上元王木齋 木齋余故

交也才氣橫逸風期雋上余
典試而木齋落解以同考未
薦非余之咎作此慰之因以

誌別

聽秦淮落葉渾不盡暮秋聲況清歌寂寂斜
陽黯黯客思沈沈題襟那回去後阻燕吳迢
遞六年心攜手河橋又別依然酒幔空青前
別時木齋策馬追送江干朗吟唐人男兒
寶叔向夜台花開一律眾爲黯然
何不請長纓揮劍刺龍庭祇麻衣入試金門
獻賦那算功名藏形不妨操畚學兵符須入
華山深四野荒雞喚曉萬重飛雁迴汀

蘇幕遮

研生塵琴結網一枕新涼心墜滄江上斗柄

低垂天宇曠耿耿秋河不隔蓬萊仗 掩銀
屏迴玉帳約略年時環佩傳清響和夢和愁
閒自想落葉聲琤誤聽黃雞唱

菩薩蠻

蘭膏欲燼壺冰裂褰帷瞥見玲瓏雪無奈夜
深時含嬌故起辭 徐將環佩整相並瓶花
影斂黛鏡光寒釵頭玉鳳單
唳鶯喚起羅衾夢柳絲無力春愁重曉枕困
相思憑春說與伊 語深良夜促鐙穗飄紅
栗迴面淚偷彈此情郎忍看

千花百草尋常見綺樓別寫芳華怨雲影護
瑤臺碧桃千朵開畫屏金鳳舞對對芝光
吐凝照倍增妍佯矜未肯前
情深不惜明璫解淚珠還沁鮫綃在雲裊翠
翹低沈沈蕙思迷畫橋秋色淺落葉重門
掩別久倍思量錦衾初夜長

蜨戀花

若使他生真箇有拌卻今生情與秋俱瘦月
影籠紗霜拂袖紅闌此夜涼初透最是聞
詞兼中酒鏡裏芙蓉一霎容消受曇誓深深

天聽否綢繆洛浦神歸後

裊裊茶煙心緒亂漠漠輕輕魂在梨花苑料
得海棠春睡倦夢回愁聽鶯聲顫 幾日浮
生偏聚枝祇有情深不似天河淺瑤井轆轤
聲宛轉斑驪那繫垂楊岸

九十韶光如夢裏寸寸關河寸寸銷魂地落
日野田黃蜨起古槐叢荻搖深翠 惆悵玉
簫催別意蕙些蘭騷未是傷心事重疊淚痕
緘錦字人生祇有情難死

點絳脣

惜別經年悄悄長憶卿知否近偎羅袖密意
花房逗借看釵鸞私掐纖纖手端相久眉
痕依舊只是黎渦瘦

齊天樂秋荷

幾時不到橫塘路西風送秋如許豔冷紅衣
涼生太液羅韞塵侵微步嫣然一顧尙低側
金盤暗擎仙露祇恐銷魂錦鴛飛入白蘋去
蟬聲又嘶遠樹有人惆悵極如怨羈旅葦
亂波橫蜚疏翠落誰信秋江能渡蟬娟日暮
願玉笛清商漫吹愁譜護惜餘香月明深夜

語

好事近

一片碧雲西夢裏
瑤姬宛在整頓平生心事
向嬋娟低拜
鮫綃別淚凝紅冰
猶憶舊時
態道是不曾消瘦
但頻拈羅帶

綠意聯句寄仲魯編修志鈞卽詠其事

湘花夢影可西風
昨夜幾回吹醒
梁鼎芬曾

記盈盈樓上黃昏
瞥見遊春鞭鐙
廷式開窗

笑語紅襟燕道
莫負海棠棲穩
芬天涯別有

桃源誤了瓊枝芳訊
式太息琴絲笛譜縱

彈盡不似舊時人聽芬暮雨蕭蕭此日江南
簾卷疏花微病式香鑪熏徹相思字又半晌
月明更靜芬祇無聊白雁橫天說與淒涼風
景式

浪淘沙

寒氣襲重衾似睡還醒鑪香靜燕夜沈沈起
視堦前明月影雲合如冰歲序使人驚染
盡緇塵寂寥空草太玄經別有蒼茫千古意
獨坐觀星

摸魚兒爲黃仲弢題吳彩鸞騎虎圖

倚蒼巖翠藤無路琅玕芝草誰問天風忽振
疏林外觀此煙鬟霧鬢斜日冷倩白虎從容
遠上匡廬頂松花滿徑看銀漢迴波石梁飛
瀑一嘯萬山應吾家事千古風流仙境何
人摹入金粉簫聲可似秦樓鳳甲帳瑤臺偕
隱環佩整羨兒女情癡也有神仙分清貧自
哂買十幅雲箋喚誰彩筆重爲寫唐韻

巫山一段雲

繫肘香囊在同心綵勝遙東風吹滿綠楊橋
離魂一度銷記得星眸寶靨醉裏花枝微

顫明燈迴照下幃羞隨郎不自由

桂殿秋

吹玉笛過江干十分春思已闌珊曉風殘月
無多地便作天涯柳絮看

臺城路湘中送星海還粵

笛聲吹冷關山月離情與天俱遠客裏年光
愁邊節物贏得滿襟依闌湘雲絮亂化一縷
輕煙欲迷春眼祇有孤芳嫣然不受暗塵染
明朝江上望極片帆欲沒處煙水瀾漫此
地相逢何時重見楚水吳山越岸迴腸已斷

更苦雨酸風助成淒惋珍重芳華綠蕉心未展

滿庭芳 擬秦少游

蘸水蘭紅黏天草碧征帆初過瀟湘別時不
覺別後轉淒涼前路煙波浩渺行行遠觸緒
堪傷雲間雁月明孤影愁絕楚天長 思量
他日事心期暗卜鐙穗成雙但千萬丁甯莫
損年芳牢繫同心結子五湖約頭白何妨風
兼雨夢魂難度敲枕聽寒江

賀新郎

別擬西洲曲有佳人高樓窈窕靚妝幽獨樓
上春雲千萬疊樓底春波如縠梳洗罷卷簾
游目采采芙蓉愁日莫又天涯芳草江南綠
看對對文鴛浴 侍兒料理裙腰幅道帶圍
近日寬盡眉峯長蹙欲解明璫聊寄遠將解
又還重束須不羨陳嬌金屋一霎長門辭翠
輦怨君王已失苕華玉爲此意更踟躕

高陽臺西湖

落葉侵愁涼颼警醉衰楊恰似眉彎病起秋
深雲煙一倍清屏憑闌冉冉斜陽下有斷魂

分付湖山乍超然精爽飛揚不似人間蓬
萊清淺今何許但歌殘黃竹信杳青鸞爲問
逋仙孤山誰伴荒寒芒蘿村下相逢地想月
娥依約嬋娟又高城鼓角聲催策馬孤還

齊天樂題高氏甕芳錄

烽煙已靜聞鐘鼓開編尙堪零涕大地平沈
長星畫出虎口逃生何地微臣自異列八甕
庭前舉家同死碧血誰收千年魂魄化精衛
淒淒石城遺曲更堪棖觸我無限傷喟傳
燮孤兒陽源後裔一樣悲涼身世年光逝水

問漢上銅仙幾回清淚聽徹荒雞攬衾中夜起

阮郎歸

誰傳消息問天台桃花開未開白雲縹緲月徘徊阮郎來不來
烏作使鳩爲媒當時玉鏡臺十年養就鳳凰胎何勞燕雀猜

浣溪沙擬唐人

著意偎人思不禁寒燈相對夜沈沈此時何必是同心
凝視酒痕侵素靨近前香氣透羅襟不情端恐負神明

采桑子

木蘭開後閒相憶
靜夜如年好夢如煙月落
參橫更不眠
當時銀燭知愁思
意遠如天
語轉如禪可奈秋花別樣妍

醉花陰
吳淞道中重九

雨入寒潮愁思悄
客裏重陽早消息誤黃花
采采江蘼終不盈襟抱
空濛草樹吳江道
也覺秋陰好去路忽沈吟
一舸飄然可信鷗
夷老

點絳脣
戊戌重九是日霜降

青女司霜無風無雨過重九無人送酒看月
呼田叟臨水登山此恨年年有君知否義
皇去久更在陶潛後

踏莎行爲人題照

淡淡修眉盈盈潤臉無言恰似筵前見花房
肯釀蜜脾濃春衫尙惜檀痕染月幌休燈
風廊卻扇畫屏十幅鮫綃展雁聲孤館醉醒
時一場愁緒思量徧

菩薩蠻

簾波輕漾屏山悄錦衾夢斷聞嘯鳥此際覺

春寒繡羅衣恁單 幽蘭凝露重江遠蘋花
共愁極夜如年靜看鑪上煙

齊天樂正月二十五日遊龍華道中梅
花盛開然天寒春遲孤豔迥絕
二月二十日再遊則桃花如海
夾岸楊柳新綠垂陰菜花初黃
梅花亦未盡落江南春色使心
怦怦乃知時光感人非寄之語
言不能自已也

芳塘水暖鳬翁浴初桐嫩遮窗窈碧瓦雲騫

香車露拂人意不禁春燒垂楊自嫋映千頃
霞光亂翻晴昊可似前番淡妝臨水數枝裊
層闌倚空縹渺凭高望不極飛燕能到屨
逕遺鈿旗亭解佩何處荒煙殘照蕭郎漸老
記不起當時冷香懷抱苦恨鷓鴣聲勸儂歸去
好

漁家傲古意贈今人

妾願苕蘿村下住浣紗不共東家女十頃荷
花三里霧迷歸路盈盈隔水誰能渡不願
吳王宮裏去陽春一曲青春暮人世繇華卿

信否渾無據金牀月落烏嘯樹

踏莎行爲人題照

舞蝶嬌春嘯鶯促曙玉溪曾賦銷魂句嫦娥
衣薄不禁寒宓妃腰細纔勝露香印成灰

雲綢賸縷紅箋好共盈盈語落花難伴綺羅

春勸君休向陽臺住

末二句用玉山詩
見夷堅志已集上

憶舊遊秋雁

庚子八月作

悵霜飛榆塞月冷楓江萬里淒清無限憑高
意便數聲長笛難寫深情望極雲羅縹渺孤
影幾回驚見龍虎臺荒鳳皇樓迴還感飄零

梳翎自來去歎市朝易改風雨多經天遠
無消息問誰裁尺帛寄與青冥遙想橫汾簫
鼓蘭菊尙芳馨又日落天寒平沙列幕邊馬
鳴

武元衡詩萬里
楓江莫問程

臨江仙金陵憶別

檀板聲停簫吹咽玉驄門外頻嘶背人無語
斂雙眉別離情緒撩亂萬千絲不道天河
能間阻此心桃葉應知臨明一陣雨霏霏淚
沾紅袖江上早寒時

毛文錫詞遙思桃葉
吳江碧便是天河隔

蝶戀花

手捲眞珠雲影瘦不怕春寒祇怕春歸驟水
遠山青凝望久幾重芳樹遮亭埃似錦年
光渾異舊爲問東君好與誰相守燕嬾鶯嬌
知恨否綠陰陰處初長晝

每到河橋臨泊處百草淒迷摠礙行人路迴
棹卻尋前日渡汪汪新漲歸程阻人世幾
回傷歲暮春也鶯飛秋也蜚曉苦欲解閑愁
愁萬緒寒牕卧聽瀟瀟雨

虞美人

鷺冠敲側蠻腰裊偎就郎懷抱阿儂衣薄曉

寒欺憑仗些兒酒力自禁持 餘香染袖人

何在夢隔珊瑚海琵琶湖畔水涵空祇有寒

梅斂恨向東風

琵琶湖近
日本西京

滿江紅

雨挹輕塵山檻外春痕初綠頻悵望方空一
抹弄簫人獨花影任教如意舞鶯聲已是將
離曲算只有落絮與遊絲飛相逐 簪素柰
歌黃竹年漸老歡難足試開箱撿取石榴囊
幅歸夢不知天近遠清愁乍滿江南問此
際僝僽爲何人眉峯蹙

清平樂 巴陵有二喬墓殆不足據喜其
亭檻軒朗艸樹幽秀聊爲題之
佩環聲杳日暮巴陵道眉樣君山青未了一
例湘娥縹渺 當年夫壻英雄而今荒草吳
宮休問香魂在否年年點綴春風二喬墓今
改題小喬
墓亦不足據故
不如仍其舊名

卜算子 新柳

雪意化春雲池水生新皺一樣眉痕兩樣描
月影初三瘦 莫到短長亭未是愁時候惆
悵黃鶯抵死催春思濃如酒

謁金門

秋未老樹樹夕陽都好霞錦雲羅黏遠草碧
天開畫稿別後許多懷抱又是黃花開了
落葉西風人悄悄雁回書不到

念奴嬌旅思

杜鵑曉後問江花江草有情何極曾是燈前
通一笑淺鬢輕籠蟬翼掩抑持觴輕盈試翦
此意難忘得如絲如絮東風吹去無力因
念久客天涯端居多感蕭瑟青蕪國懷抱向
人何處盡卧聽林風淒寂經卷楞嚴琴聲賀

若靜翫鑪煙直微寒隕蕊瑤華追渾堪惜

攤破浣溪沙

竹粉黏青露點衣柳絲吹白水平池爲報游
人休草草惜芳時臨鏡祇應江月照拳帷
莫使楚雲疑不道平生惆悵意有人知

念奴嬌亂後京津樂籍大半南渡李伯
元茂才於酒肆廣徵四十餘人

爲評騭殘花之舉爲賦此詞

江湖歲晚正少陵憂思兩鬢衰白誰向水精
簾子下買笑千金輕擲淒訴鷓鴣弦豪斟玉罌

黛掩傷心色更持紅燭賞花聊永今夕 聞
說太液波翻舊時馳道一片青青麥翠羽明
璫漂泊盡何況落紅狼籍傳寫師師詩題好
好付與情人惜老夫無語卧看月下寒碧

點絳脣

水際春回曲闌環合庭陰翠縠紋波細石罅
看魚戲 宛宛韶光著處偎人膩春知未青
蕪滿地易惹天涯思

玉漏遲 辛丑七夕

嬾尋天上巧夜闌愁對碧窗秋悄細數更籌

重憶舊時懷抱多少人間別恨渾不解金風
來早靄約杳一痕淡月籠雲淒照 羨他碧
漢無波便萬歲千秋後期難了自軫琴心漫
託彩鸞同調一晌夢遊處恰又似浮槎仙島
人易老南樓幾番清嘯

一晌句周草窗用
五字句今從之

思佳客古意

十幅緗簾窄地垂千株楊柳麴塵絲玉人手
把菱花照絕代紅顏欲贈誰 花子薄翠顰
低輕紗吉了稱身宜苙蘿女伴如相問莫道
儂家舊住西

沈佺期詩千載
紅顏持贈君

感皇恩中秋

梧葉碎秋光小。牕眠醒自理。琴書碧天靜。文
園病減，尙怯西風清勁。祕資聊試水煎春茗。
故人何在，曲闌空凭料，損多情。舊心性冰
匳愁展，今夜月明如鏡。斷腸楓落也。吳江冷。
疏影秦淮有所贈

涼蟬隕葉正。碧波渺渺秋在城堞。酒所淒涼
相喚移船華燈掩映。佳俠宜城放客多愁思。
寫不盡琴心三疊。數合懽製就齊紈。誰料未
秋先篋。坐對江湖興杳。便當自此去。同理

舟楫卻恨青銅華髮星星那稱絳脣丹靨從
渠自向空王懣恰難忘楸花香裏甚四弦解
訴飄零歌畔淚珠盈睫宜城放琴客詩見顧
況集記柳惲事吳夢
總詞曾用宜
城放客字

南鄉子病中戲筆

一室病維摩且喜閒庭掩雀羅煮藥繙書渾
有味呵呵老子無愁世則那莽莽舊山河
誰向新亭淚點多惟有鷓鴣聲解道哥哥行
不得時可奈何

凭闌人詠水仙花

秣駟芝田經幾時
袖裏明璫光未已
華燈寫
澹姿綽矯饒知似誰

鷓鴣天

明月多情上綺疏
伴儂無寐四更餘
朦朧世態休看鏡
撩撥清愁且著書
螢火暗雁聲孤
露光浮
白
夜涼初
桂宮曾寄
千千信爲問
仙娥憶得無

清平樂

春人婀娜春恨吟難妥
一縷醲香熏意可獨
倚雲屏閒坐
林間百種鶯啼
玉階撩亂花

飛生怕轆羅塵浣黃昏深下犀帷

疏影爲思惠齋主人題蓬萊春影圖

煙螺想髻更柳疏楓密芳思無際縹渺空山
可是曾來瞥見瑤階仙侍人言海水三清後
有瓊瑟玉杯重遺恰無聊化作朝雲一霎滄
波迢遞幾度花開花落對霞影猶憶靚妝
明惠石逕苔封化鶴人歸黯澹蕊珠文字浮
萍偶值原無定好認取天花遊戲奈夢回雨
瀉高簷窗外葉聲如悴

光緒三十三年閏二月門下李陵繪了昌謹校